

ԳԼՈՒԽ Է.

ԱԶԳԱՅԻՆ ՀԱՄԱԳՈՒՄԱՐ. ԿՕԱԼԻՑԻԱՅԻ ԽԶՈՒՄԸ

Հայաստանի Խորհրդարան

Մայիս 28-ի հանդեսները անցան ընդհանուր ոգևորութեան ու համեմարալսութեան մթնոլորտում:

«Կեցցէ՛ Միացեալ, Անկախ և Ազատ Հայաստանը» գրում էր մեծատառ՝ ժողովրդականների «Ժողովուրդ» պաշտօնաթերթը, իսկ մէկ օր յետոյ, Մայիս 28-ի աքտը անւանում էր «պետական յեղաշրջում», արդիւնք մինիստրական կազմի պատահական մեծամասնութեան»: «Այդ աքտը կունենար խոշոր բարոյական նշանակութիւն, գրում էր թերթը, եթէ նա յայտարարէր պարլամենտի կողմից»: Ուրեմն, աքտի էութիւնը չէր յուզողը, այլ՝ ձևը — մի ձև, որ մշակել էր և իրենց՝ ժողովրդականների մասնակցութեամբ:

Մի քանի օր անցած, Երևան վերադարձաւ Ս. Յարութիւնեանը, որ թիֆլիսումն էր և մայիսեան հանդեսներին չէր մասնակցել: Եւ այդ ժամանակ մէջտեղ եկաւ ժողովրդականների բողոքը ընդդէմ Մայիս 28-ի աքտի, որը, իբր թէ, չէր համապատասխանում հայ ժողովրդի շահերին: Ս. Յարութիւնեանը հիմնաւորում էր իրենց տեսակէտը նրանով, որ Մայիս 28-ի աքտը կրում է միակողմանի բնոյթ, չունի Պօղոս Նուպար փաշայի հաւանութիւնը, չի բխում հայկական հարցի միջազգային կացութիւնից և, հետևաբար, պէտք է յայտարարւի չեղեալ: Նրան պատասխանում էին, որ յայտարարութիւնը պատրաստած ու կատարած է ամբողջ կառավարութեան, հետևաբար և ժողովրդական նախարարների հաւանութեամբ, որ Մայիս 28-ի յայտարարութեան տակ յօժար կամքով ստորագրել են և կառավարութեան ժողովրդական անդամները, որ հանդէսին նախագահողը նոյնիսկ ժողովրդական նախարար էր և որ, այդ բոլորից յետոյ, անտեղի էին չոր առարկութիւններ առաջ քաշելը: Բայց ժողովրդականները պնդեցին իրենց պահանջի վրա, որը նրանց պաշտօնաթերթ «Ժողովուրդ»-ը (յունիս 4) հետևեալ կերպով էր ձևակերպում. «Միացեալ Հայաստանի պետական իշխանութիւնը պիտի կազմակերպւի Փարիզի դործադիր մարմնի և Հայաստանի հանրապետական կառավարութեան փոխադարձ համաձայնութեամբ: Պիտի ստեղծւի մի ժամանակաւոր խառն կառավարութիւն, որը պիտի գումարի Միացեալ Հայաստանի հիմնադիր ժողով, կամ պարլամենտ, եթէ մինչ այդ մշակած լինի երկրի սահմանադրութիւնը: Ուրիշ կերպ լուծել